

四庫全書

史部

欽定四庫全書

史部

御定月令輯要卷十八

詳校官監察御史_臣查瑩

檢討_臣德生覆勘

總校官知縣_臣繆琪

校對官學正_臣翁樹棠

謄錄監生_臣段文新

欽定四庫全書

御定月令輯要卷十七

冬令

天道

坎為勞卦

增易勞乎坎疏坎是象水之卦水行不舍晝夜所以為勞卦又是正北方之卦斗柄指北

於時為冬冬時萬物閉藏

初受為勞是坎為勞卦也

冬日

原詩冬日烈烈燄烈燄猶栗烈也增張正元冬日

後詩書惟屬思光難駐舒情影若遺晉臣曾比德謝客昔言詩散彩寧偏照流陰信不追餘輝如可就迴燭幸

無私韓維詩端居無所聊稍復治文字南堂冬
日明窻戶煖可喜圖書羅滿前意覽不由次

壬癸

增禮其日壬癸注壬之言任也癸之言揆也日之
行東北從黑道閉歲萬物月為之佐時萬物懷任

於下揆然萌芽又因以為日名焉漢書律歷志懷任於
壬陳揆於癸說文壬北方位也陰極陽生象人褻妊之
形癸承壬象人足原釋名壬妊也陰陽交物懷
妊也至子而萌也癸揆也揆度而生乃出之也

顓頊元冥

增禮其帝顓頊其神元冥注顓頊高陽氏也
元冥少皞氏之子曰修曰熙為水官疏按左

傳云少皞氏有子曰修曰熙為元冥是相代為水官也
帝王世紀顓頊黃帝之孫昌意之子以水承金位在北

方主冬以水事紀官陸雲歲暮賦顓頊御時玄冥統官
天廟既底日月貞觀淪重陽於潛戶兮嚴積陰於司寒

冬為中

增禮北方者冬冬之
為言中也中者歲也

玄英

原爾雅冬為玄英
注氣黑而清英

安寧

原爾雅冬為安寧
新論冬之德寒寒不信
則水土不堅水土不堅則安靜之德廢

月德

原管子北方曰月其時曰冬其氣曰寒
寒生水與血其德淳越溫怒周密其事號令修禁徙民令靜

止地乃不泄
斷刑致罰無赦有罪以符陰氣大寒乃至
甲兵乃強五穀乃熟國家乃昌四方乃備此謂月德月

掌罰罰為寒注月以
閉歲罰罪為德也

冬為信

原尸子冬為信北方為冬萬物冬皆
伏貴賤若一美惡不減信之至也

斗柄指北

原鶡冠子斗柄
北指天下皆冬

閉凍

原韓非子周公曰冬日之閉凍也不固則春夏之
長草木也不茂天地不能常侈常費而況於人乎

陽氣下藏

增越絕書冬三月之時草木既死萬物各異藏故陽氣避之下藏伏壯於內使陰陽得成

功於外原後漢書魯恭傳易曰潛龍勿用言十一月十二月陽氣潛藏未得用事雖煦噓萬物養其根莖而猶

盛陰在上地凍水冰陽氣否隔閉而成冬

天關動

增史記天官書黑帝行德天關為之動注黑帝北方協光紀之帝也冬萬物閉藏為之動為之

也開閉

辰星

增漢書天文志辰星曰北方冬水知也聽也知虧聽失逆冬令傷水氣罰見辰星

伏方

原漢書律歷志太陰者北方北伏也陽氣伏於下於時為冬冬終也物終藏乃可稱尚書大傳北方

者何也伏方也伏方何以謂之冬冬者中也中也者物方藏於中也故曰北方冬也

乘坎執權

原漢書魏相傳北方之神顓頊乘坎執權司冬注水為智智者謀謀者重故為權

助冬藏

增春秋繁露太陰因水而起助冬之藏也

日行北陸

原後漢書律歷志日行北陸謂之冬易統通圖日東行北方黑道曰北陸

羽聲調

增晉書律歷志水音羽三分商去一以生其數四十八屬水者以為最清物之象也冬氣和則

羽聲調

雪花六出

原宋書符瑞志草木花多五出雪花獨六出增張正見詩九冬飄遠雪六出表豐年

六氣十八候

增埤雅立冬之節初五日水始冰次五日地始凍後五日雉入大水為蜃次小雪氣

初五日虹藏不見次五日天氣騰地氣降後五日閉塞而成冬次仲冬大雪之節初五日鵲鳴不鳴次五日虎

始交後五日荔挺出次冬至氣初五日蚯蚓結次五日麋角解後五日水泉動次季冬小寒之節初五日雁北鄉次五日鵲始巢後五日雉始雊次大寒氣初五日雞始乳款冬華次五日鶯鳥厲疾後五日水澤腹堅凡此六氣一十八候皆冬氣正養歲之令

三建之氣

增蠡海集三建雖曰天開於子地闢於丑人生於寅然却但以冬至為一建小寒為二建

大寒為三建也何以知其然也蓋造歷始於冬至察天氣也候花信之風始於小寒察地氣也辨人身之氣始於大寒以厥陰為首察人氣也豈非三建之氣只在於立春之前也歟

政典

冬烝

原禮冬曰烝疏烝者衆也冬之時物成者衆孫炎云烝進也進品物也增公羊傳冬曰烝注薦尚稻

鴈丞衆也氣盛貌冬萬物畢成所薦衆多芬芳備具故曰丞

車旂服物

原禮乘玄路駕鐵驪載玄旂衣黑衣服玄玉食丞與彘其器閑以奄注丞秀舒散屬火寒

時食之亦以安性也彘水畜也器閑而奄象物閑藏也

獻狼

原周禮天官獸人冬獻狼疏狼山獸是聚故狼膏聚聚則溫故冬獻之

堂贈

增周禮春官男巫冬堂贈無方無筭道里無數遠益善也疫也無方四方為可也無筭道里無數遠益善也

祭馬步

原周禮夏官校人冬祭馬步獻馬講馭夫注馬步神為災害馬者獻馬見成馬於王也馭夫馭

貳車從車使車者講猶簡習

沃漏

增周禮夏官挈壺氏及冬則以火爨鼎水而沸之沃之注冬水凍漏不下故以火炊水沸以沃之

欽定四庫全書

御定月令輯要

謂沃
漏也

祭功臣

原周禮夏官司勲凡有功者祭於大烝疏冬時物成者衆故祭功臣

攻蟄獸

增周禮秋官穴氏掌攻蟄獸各以其物火之注蟄獸熊羆之屬冬藏者也將攻之必先燒其所

食之物於穴外以誘出之乃可得之

冬官

增周禮冬官考工記疏象冬所立官也是官名司空者冬閉藏萬物天子立司空使掌邦事亦所以

富立家使民無空者也唐書百官志光宅元年改工部曰冬官

冬狩

原爾雅冬獵為狩疏狩圍守也冬物畢成獲則取之無所擇也

事時

增左傳襄公十三年冬城防書事時也於是將早城戚武仲請俟畢農事禮也注土功雖有常節通

以事間
為時

烝獻功

增國語王后親織元統公侯之夫人加之以紃
繼卿之內子為大帶命婦成祭服列士之妻加

之以朝服自庶士以下皆衣其夫社而賦事烝而獻功
男女效績愆則有辟注冬祭曰烝烝而獻五穀布帛之
也功

六行時節

增管子六行時節君服黑色味鹹味聽徵聲
治陰氣用六數飲於黑后之井以鱗獸之火

豐藏慈厚行薄純坦氣修通注水成
數六水氣行君則順時節而布政

冬五政

孤原管子冬三月以壬癸之日發五政一政曰論
孤獨恤長老二政曰善順陰修神祀賦爵祿授

備位三政曰效會計毋發山川之藏四政曰捕盜遁得
盜賊者有賞五政曰禁遷徙止流民圉分異五政苟時

欽定四庫全書

御定月令輯要

五

冬事
不過

水行御

增管子睹壬子水行御天子出令命左右使人

盜賊數剽竹箭伐檀柘令民出獵禽獸不擇巨少而殺

之所以貴天地之所閉藏也然則羽卵者不段毛胎者

不贖臃婦不銷棄草木

后土為李

增管子后土辯乎北方故使為李是故冬

收五藏

增管子冬收五藏最萬物所以內作民也注於四時事皆脩故人有百倍之功

出衣發粟

原晏子春秋景公之時雨雪三日而不霽公被狐白之裘坐堂側陞晏子入見公曰怪哉

雨雪三日而不寒晏子對曰嬰聞古之賢君飽而知人之飢溫而知人之寒今君不知也公曰善乃令出衣發

粟與飢寒

徙函谷關

增漢書武帝紀元鼎三年冬徙函谷關於新安以故關為弘農縣

作盛唐樅陽歌

增漢書武帝紀元封五年冬行南巡狩至於盛唐望祀虞舜於九嶷登瀛天柱

山自尋陽浮江親射蛟江中獲之舳艫千里薄樅陽而出作盛唐樅陽之歌遂北至瑯邪並海所過禮祠其名山大川

立北時

增漢書郊祀志高祖二年冬東擊項籍而還入關問故秦時上帝祠何帝也對曰四帝有白青

黃赤帝之祠高祖曰吾聞天有五帝而四何也吾知之矣迺待我而具五也迺立黑帝祠名曰北時

水神司令

原淮南子北方之極自九澤窮夏晦之極北至令正之谷有凍寒積冰雪電霜霰漂潤羣

水之野顓頊玄冥之所司者萬二千里其令曰申羣禁固閉藏修障塞繕關梁禁外徙斷罰刑殺當罪閉闔閭大搜客止交遊禁夜樂蚤閉晏開以塞姦人已得執之必固天節已幾刑殺無赦雖有盛尊之親斷以法度毋行水毋發藏毋擇罪注元冥水神

司空司冬

原大戴禮司空司冬以制度制地事準揆山林規表衍沃畜水行衰濯浸以節四時之事

治地遠近以任民力以節民食

成冬事

增大戴禮方冬三月草木落庶虞歲五穀必入於倉於時有事烝於皇祖皇考息國老六人以

成冬事

固地藏

原尚書大傳天子以冬命三公謹蓋藏閉閭固封境以佐冬固地藏也

遣子入侍

增後漢書光武紀建武二十一年冬鄧善王車師王等十六國皆遣子入侍奉獻願請都

護帝以中國初定未遑外事廼還其侍子厚加賞賜

上狀流涕

原後漢書虞詡傳祖父經為郡獄吏案法平允務存寬恕每冬月上其狀恒流涕隨之嘗

稱曰東海于公高為里門而其子定國卒至丞相吾決獄六十年雖不及于公其庶幾乎子孫何必不為九卿

邪故字詡曰升卿

教民織績

原後漢書崔寔傳出為五原太守五原土宜麻桑而俗不知織績民冬月無衣積細草而

卧其中見吏則衣草而出寔至官斥賣儲峙為作紡績織絁練縕之具以教之民得以免寒

講五行章句

增後漢書桓郁傳注上謂郁曰卿經及先師致復文雅其冬上親於辟雍自講所制

欽定四庫全書

御定月令輯要

五行章句已復令郁說一篇上謂郁曰我為孔子卿為子夏起予者商也

修戎講武

增魏志杜畿傳畿為河東太守課民畜犗牛草馬下逮雞豚犬豕皆有章程百姓勸農家

家豐實畿乃曰民富矣不可不教也於是冬月修戎講武又開學宮親自執經教授郡中化之

鄭陂

增魏志鄭渾傳遷陽平沛郡二太守郡界下濕患水滯百姓飢乏渾於蕭相二縣界興陂過開稻田

郡人皆以為不便渾曰地勢灣下宜溉灌終有魚稻經久之利此豐民之本也遂躬率吏民興立功夫一冬間皆成比年大收頃畝歲增租入倍常民賴其利刻石頌之號曰鄭陂

宣武觀大閱

增晉書禮志武帝咸寧元年太康四年六年冬皆自臨宣武觀大閱衆軍

綈几

原西京雜記漢制天子玉几冬則加綈錦其上謂之綈几以象牙為火籠籠上皆散華文後宮則五

色綾文以酒為書滴取其不冰以玉為硯亦取其不冰
公侯皆以竹木為几冬則以細蜀為素以憑之不得加
錦綈

把燭看事

增梁書武帝紀勤於政務孜孜無怠每至冬
月四更竟即勅把燭看事執筆觸寒手為皴

裂

方山埭

增梁書沈瑀傳湖熟縣方山埭高峻冬月公私
行侶以為艱難明帝使瑀行治之瑀乃開四洪

斷行客就作
三日立辦

受田簿歷

增唐六典京畿及天下諸縣令若應受之田
皆起十月里正勘造簿歷十一月縣令親自

給授十二
月內畢

欽定四庫全書

朝集使考績

增唐六典凡天下朝集使皆令都督刺史及上佐更為之皆以十月二十五日至於

京都十一月一日戶部引見訖於尚書省與羣官禮見然後集於考堂應考績之事

舊判注擬

增唐六典凡注官皆對面唱示若官資未相當及以為非便者聽至三注三注不伏注至

冬檢舊判注擬

冬教義勇

增長編宋仁宗朝河北河東初置義勇至英宗朝推行其法漸及陝西皆以地接胡羗有

守禦之備每歲冬教一月民雖以為勞而邊防之計有不得已

祠事隸太常

增王海熙寧四年冬詔以諸寺監祠事隸太常以肅奉神之禮

民用

旨蓄

原詩我有旨蓄亦以御冬箋蓄聚美菜者以御冬月乏無時也

魚性定

增詩序潛季冬薦魚疏冬月既寒魚不行乃性定而肥充故冬薦之也天官庖人注云魚鴈水

涸而性定則十月已定矣但十月初定季冬始肥取其尤美之時薦之也

冬脉如營

增內經帝曰冬脉如營何如而營岐伯曰冬脉者腎也北方水也萬物之所以合藏也故

其氣來沈以搏故曰營

養藏

原內經冬三月此謂閉藏水冰地坼無擾乎陽早臥晚起必待日光使志若伏若匿若有私意若已

有得去寒就溫無泄皮膚使氣亟奪此冬氣之應養藏之道也逆之則傷腎

稻舍水

增春秋說題辭稻之為言藉也稻冬舍水盛其德也故稻太陰精舍水漸洳乃能化也江旁多

稍固其
宜也

女工

原漢書食貨志冬民既入婦人同巷相從夜績女工一月得四十五日必相從者所以省費燎火同

巧拙而合
習俗也

文史足用

原漢書東方朔傳朔上書曰臣年十三學書三冬文史足用注貧子冬日乃得學書言文

史之事足
可用也

祭井

增白虎通冬祭井井者水之深歲在地中冬亦水王萬物伏藏

臥東藁中

原三輔決錄孫辰字允公家貧不仕居杜城中織箕為業明詩書為郡功曹冬月無被有

藁一束暮臥
其中旦收之

祀行

增獨斷行冬為太陰盛寒為水祀之於行在廟門外之西較壤厚二尺廣五尺輪四尺北面設主於

上較

韭萍蠶

原晉書石崇傳每冬得韭萍蠶王愷密貨崇帳下問其所以荅云韭萍蠶是搗韭根雜以麥苗

耳

冬祀

增廬諶祭法冬祀用雉腊兔腊又冬祀用甘用荊錫

不寒方

增抱朴子或問不寒之道抱朴子曰或以立冬之日服六丙六丁之符或閉口行五火之炁千

二百遍則十二月月中不寒也或服太陽酒或服紫石英米漆散或先服雄丸一雌丸二亦可堪一日一夜不寒

也雌丸用雌黃曾青礬石磁石也雄丸用雄黃丹砂石膽也

欽定四庫全書

御定月令輯要

肥馬草

原南方草木狀南方冬無積葉瀕海郡邑多馬有草葉類梧桐而厚取以秣馬謂之肥馬草馬

頗嗜而食
果肥壯矣

冬葉

原南方草木狀冬葉蘆葉也苞苴物交廣皆用之南方地熱物易腐敗惟冬葉藏之乃可持久

莽煌為席

增拾遺記岱輿山有草名莽煌葉圓如荷去之十步炙人衣則焦刈之為席方冬彌溫以

枝相摩
則火出

醇和麥

增拾遺記背明國在扶桑東見日出於西方其國昏昏常暗有醇和麥為麴以釀酒一醉累月

食之凌
冬可袒

蒟蒻

增益州記蒟之莖蜀人於冬月取以舂碎炙之水淋一宿為蒻

採雄黃

增水經注黃水出零陽縣西北連巫山溪出雄黃頗有神異採常以冬月祭祀鑿石深數丈方

得佳黃故溪水取名焉

採朮

增名醫別錄朮以蔣山白山茅山者為勝十一月採者好多脂膏而甘其苗可作飲甚香美

種瓜子

增齊民要術區種瓜法以瓜子布坑中以糞覆之又以土薄散糞上以足微躡之冬月大雪時

連併力推雪於坑上為大堆至春草生瓜亦生莖葉肥茂異於常者又法冬天以瓜子數枚內熟牛糞中凍即

拾聚置之陰地正月地釋即耕布之糞土覆之肥茂早熟

藏雪汁

增齊民要術搜種可用雪汁雪汁者五穀之精也使稼耐旱常以冬藏雪汁器盛埋於地中治

種如此則收常倍

預知子

增圖經本草預知子蔓生依大木上葉綠有三角實作房生青熟深紅色每房有子五七枚斑

褐色光潤如飛蛾蜀人每貴重之其根冬月采之陰乾治蠱其功勝於子也相傳取子二枚綴衣領上遇有蠱

毒則聞其有聲當預知之故名

蒺藜

增圖經本草蒺藜冬月采之黃白色郭璞云布地蔓生細葉子有三角刺人

菩薩草

增圖經本草菩薩草生江浙州郡凌冬不凋秋中有花直出赤子如莢頭冬月采根用味苦主

中諸毒研服之又諸蟲傷搗汁飲并傅之

桃諸

增釋名桃諸藏桃也諸儲也藏以為儲待給冬月用之也

瓠蓄

增釋名瓠蓄皮瓠以為脯蓄積以待冬月時用之也

醖醕

增唐本草醖醕醕之精液好醕一石
有三四升醖醕在醕中盛冬不凝

服藥酒

增千金方冬三月宜服藥酒一二
杯立春則止終身常爾百病不生

石燕

增食療本草石燕在乳穴
石洞中者冬月采之堪食

暖寒會

原開天遺事巨豪王元寶每至冬月大雪之際
令僕夫自本家坊巷口掃雪為徑路躬親立於

坊巷前迎揖賓客就本家具
酒炙宴樂之為暖寒之會

玉枝

增福地記抱犢山有草名玉枝冬生花高
五六尺味頗甘取其葉末服之可以不飢

山薑

增嶺表錄異山薑莖葉皆薑也但根不堪食亦與
豆蔻花相似而微小爾花生葉間作穗如麥粒醖

藏入甜糟中經冬如琥珀色
辛香可愛用為鱠無以加矣

花腊

增清異錄餘醪盛開時置書冊
中冬間取以棹髻蓋花腊耳

魚兒酒

增清異錄裴晉公盛冬嘗以魚兒酒飲客其法
用龍腦凝結刻成小魚形狀每用沸酒一盞投

一魚
其中

黑金社

增清異錄廬山白鹿洞遊士輻輳每冬
寒釀金市烏薪為禦冬備號黑金社

曉羹寒鮓

增清異錄吳淑冬日招客詩云曉羹沈玉杵
寒鮓疊金綿杵謂小截山蕨綿乃黃雀脂膏

服天門冬

增證類本草列仙傳云赤松子服天門冬齒
落更生細髮復出太原甘始服天門冬在人

間三百餘年聖化經云以天門冬茯苓等分為
末日服方寸匕則不畏寒大寒時單衣汗出也

無烟柴

增物類相感志伏中收松柴斫碎以
黃泥水浸皮脫晒乾冬月燒之無烟

朝天門市

增乾淳歲時記都下自十月以來朝天門內外競售錦裝新歷諸般大小門神桃符鍾馗

後貌虎頭及金絲縷花春帖襍勝之類為市甚盛

醉魚

增曲洧舊聞漆洧之源出馬嶺今在河南府永安界號玉仙山歷城東南為漆洧其水清有魚數種

土人不善施網罟冬積柴水中為罾以取之以擣澤蓼雜煮大麥撒深潭中魚食之輒死浮水可俯掇久之復

沽謂之醉魚云

水絃坑石

增歙硯說水絃坑在眉子坑外臨溪至冬水涸方能取之入地丈餘石多金花

采威靈仙

增開寶本草威靈仙出商州上洛山及華山并平澤以不聞水聲者為良生先於衆草方

莖數葉相對冬月丙丁戊己日采根用

食蘆菹

增五色線王旻好勸人食蘆菹根葉云冬食功多力甚養生之物也

冬瓜

增湧幢小品白冬瓜一二斗許大冬月收為菜又蜜餞代果可以禦冬故曰冬瓜今皆誤書曰東蓋

因西瓜之對也

韭黃

增本草綱目北人至冬移根於土窖中培以馬屎暖則即長高可尺許不見風日其葉黃嫩謂之韭

黃豪貴皆珍之

冬蔥

增本草綱目冬蔥即慈蔥或名大官蔥謂其莖柔細而香可以經冬大官上供宜之故有數名

鯽魚

增本草綱目鯽魚雅云鯽魚旅行以相即也故謂之鯽不食雜物故能補胃冬月肉厚子多其味尤美

玉面狸

增本草綱目南方有玉面狸專上樹木食百果冬月極肥人多糟為珍品大能醒酒

鼠鬚筆

增本草綱目鼯似貂而大色黃而赤其毫與尾可作筆嚴冬用之不折世所謂鼠鬚栗尾者是

也

德慶果

增本草綱目德慶果廣之德慶州出之其樹冬榮子大如盃炙而食之味如豬肉

冰鼠席

增本草綱目冰鼠東方朔云生北荒積冰下皮毛甚柔可為席臥之却寒

敲冰紙

增楊慎集張伯玉蓬萊閣詩敲冰紙剗水清潔山又多

藤楮以敲冰時製之佳蓋冬水也

芋白

增農政全書霜後芋子上芋白擘下以液漿水燂過臘乾冬月炒食味勝蒲笋

木瓜飲

增農政全書木瓜爛蒸搗作泥入蜜與薑作煎飲用冬月尤美

寄魚

增農政全書冬月乾塘取魚寄別池內或入大桶速乾水取生泥壅池生泥只取爛泥弗取乾者取

過泥速栽荇草放水入魚凡小池定在大池之旁以便冬月寄魚

迎風不冷

增農政全書用馬牙硝為細末唾調塗手及面則寒月迎風不冷

鮎魚

增邵武縣志樵嵐山一名金蓮峯樵溪之水出焉溪產魚曰鮎紅翼而白鰓冬月始出漁人競取之

益腎氣

原雲笈七籤治腎當用吹吹為瀉吸為補夫腎者陰之精坎之氣其色黑其象如圓石其神如

白鹿兩頭化為玉童長一尺出入於腎藏腎者冬之用事常以十月十一月十二月面北平坐鳴金梁七飲玉

泉三吸元宮之黑氣入口九吞之以補吹之損以符吻鹿之詞以致玉童之饌益腎氣神和體安可致長生之

道

物候

蝻子冬生

原春秋宣公十五年冬蝻生註蝻子以冬生遇寒而死故不成蝻

猾褢

增山海經堯光之山有獸焉其狀如人而彘鬣穴居而冬蟄其名曰猾褢其音如斲木見則縣有大

繇

石水

增內經三陽獨至期在石水註石水者謂冬月水永如石之時故云石水也

櫟木

增列子吳楚之國有大木焉其名為櫟碧樹而冬生實丹而味酸食其皮汁已僨厥之疾齊州珍之

渡淮而北而化為枳焉

桂樹冬榮

原楚辭嘉南州之炎德兮麗桂樹之冬榮

魚柏冬日

增史記河渠書天子既臨河決作歌曰吾山平兮鉅野溢魚沸鬱兮柏冬日註柏猶迫也

漢書音義曰鉅野滿溢則衆魚沸鬱而滋長也迫冬日乃止

薺冬美

增春秋繁露薺以冬美冬水氣也薺甘味也乘於水氣而美者甘勝寒也夏侯湛薺賦寒冬之

日余登乎城趾步乎北園見芳薺之時生被畦疇而獨繁鑽重氷而挺茂蒙嚴霜以發鮮

靈草

增後漢書班固傳靈草冬榮神木叢生

冬生草

原說文竹冬生草也象形下垂者箬箬也

女貞

增典術女貞木者少陰之精冬葉不落鄭氏婚禮謁文贊女貞之樹柯葉冬生寒涼守節險不能傾

冬得生葵

增列仙傳丁次都不知何許人為遼東丁氏作奴丁氏常使買葵冬得生葵問何得此葵

云從日
南買來

簾筍

增竹譜簾筍竹類一尺數
節亦中作矢其筍冬生

長樂華

增傅休奕紫花賦序紫華一名長樂華舊生於
蜀其東畧特饒中國奇而種之余嘉其華純耐

久可歷冬而服故
與友生各為之賦

崑崙柰

原拾遺記崑崙山有柰冬生子碧色
以玉井水洗食之骨輕柔能騰虛也

辟寒金

原述異記三國時昆明國貢魏嗽金鳥鳥形如
雀吐金屑如粟至冬此鳥即畏霜雪帝乃起溫

室以處之名曰辟寒臺
故謂吐此金為辟寒金

冬杏

增述異記杏園洲在南海中洲中多杏
海上海上人云仙人種杏處洲中別有冬杏

丹水

增水經注丹水東南歷西巖下巖下有泉湧發
洪源巨輪淵深不測蘋藻冬芹竟川含綠雖嚴辰

肅月燕
麥暄萎

忍冬

原名醫別錄忍冬藤生
凌冬不凋故曰忍冬

檉木冬榮

增江淹檉頌木貴冬榮檉實
寒色停黛峰頂揀翠石側

山橘子

增北戶錄山橘子冬熟有大如土瓜者
次如彈丸者皮薄下氣普寧多有之

木醴

增建康實錄陳後主禎明二年初覆舟山及松柏
林冬月出木醴後主以為甘露之瑞俗呼為雀錫

水耐冬

增酉陽雜俎水耐冬此草經冬在水
不死成式於城南村墅池中有之

蟻窠甘實

增酉陽雜俎嶺南有蟻大於秦中馬蟻結窠
於甘樹甘實時常循其上故甘皮薄而滑往

往甘實在其案中冬深
取之味數倍於常者

水底蘋

增西陽雜俎太原晉祠冬
有水底蘋不死食之甚美

水扎鳥

增太平御覽南夷志水扎鳥
出昆明池冬月遍於水際

冬桃

增曲洧舊聞密縣有一種冬桃秋花夏實八九月
間桃自開其核墮地而復合肉生滿其中至冬而

熟味如淇上銀桃
而加美亦異也

川芎藭

增益部方物記芎藭為藤蕪楚辭謂江離者根
為芎藭落時可用作羹蜀少寒莖葉不萎今醫

家最貴川芎云贊桑葉美根冬
不殞零采而掇之可糝於羹

長生草

增益部方物記長生草山陰蕨地多有之修莖
茸葉色似檜柏而澤經冬不凋損故號長生贊

色與柏類苒苒其莖冬不甚黃故謂長生

羞寒花

增益部方物記羞寒花蜀地處處有之根莖綴花蔽葉自隱俗曰羞天花子易為羞寒花贊胃

寒而茂莖修葉廣附莖作花葉蔽其上以其自蔽若有羞狀

燭麻

增益部方物記燭麻葉能螫人有花無實冒冬弗悴可以祛疾

冬青

增政和本草冬青冬月青翠故名冬青江東人呼為凍青

伏翼服氣

增本草綱目伏翼善服氣故能壽冬月不食

兔得金氣

增本草綱目兔至冬月齧木皮得金氣而氣內寶故味美至春食草麥而金氣衰故不美

也

禽蟄

增古詩翩翩堂前燕冬藏夏來見本草綱目倉庚

又杜鵑不能為巢居他巢生子冬月則藏蟄

拒冬

增本草綱目續隨子一名拒冬蘇頌曰葉中出葉數數相續而生故名續隨子冬月始長故又名拒

冬

遊冬

增本草綱目苦菜一名遊冬經歷冬春故名

柳寄生

增羣芳譜柳寄生狀類冬青亦似紫藤經冬不凋冬月望之雜百樹中榮枯各異出蜀中

海梅

增歲眉山志海梅高僅三尺冬月開小花結實如櫻桃

占驗

愆候

增管子冬行春秋政霧行夏政雷行春政
泄淮南子冬行春令泄行夏令旱行秋令霧

夏秋霖雨

增管子冬作土功發地藏則夏多暴雨秋霖不止

冬之德寒

增呂氏春秋冬之德寒寒不信其地不剛地不剛則凍閉不開

月行角天門

增史記天官書月行角天門十月為四月十一月為五月十二月為六月水發近三

尺遠五尺註謂月行入角與天門若十月犯之當為來年四月成灾十一月則主五月也

霧淞

增曾鞏齊州冬夜詩香清一榻氈暖月淡千門
霧淞寒自註齊寒甚夜氣如霧凝於木上旦視如

雪日出飄滿階庭尤為可愛齊人謂之霧淞諺
曰霧淞重霧淞窮漢置飯甕以為豐年之兆

麥宜雪

增種樹書麥最宜雪諺云冬無雪麥不結

護霜天

增農政全書冬天近晚忽有老鯉斑雲起漸合成濃陰者必無雨名曰護霜天

南風作雪

增農政全書冬天下風三兩日必有雪

日行下道

增雜寶藏經須彌山有上下道日於冬時行下道路近行速照大海水故短而極寒

雜紀

築郎園

增左傳昭公九年冬築郎園書時也李平子欲其速成也叔孫昭子曰詩曰經始勿亟庶民子

來焉用速成其以勦民也

如挾纊

原左傳宣公十二年冬楚子伐蕭遂圍蕭申公巫臣曰師人多寒王巡三軍拊而勉之三軍之

士皆如挾纊

景公履

原晏子景公為履黃金之綦飾以銀連以珠良玉之絢其長尺冰月服之以聽朝晏子朝公迎

之履重僅能舉足問曰天寒乎晏子曰君奚問天之寒也古聖人製衣服也冬輕而暖夏輕而清今君之履冰月服之是重寒也履重不節是過任也

不龜手藥

增莊子宋人有善為不龜手之藥者世以

說吳王越

人有難吳王使之將冬與越人水戰大敗越人裂地而封之

叩絃冰散

增列子鄭師文學琴於師襄當冬而叩微絃以激蕤賓陽光熾烈堅冰立散

罷鑿池役

原呂氏春秋衛靈公曰天寒乎宛春諫曰天寒起役恐傷民公曰天寒乎宛春曰公衣狐

裘坐熊席厥隅有竈是以不寒今民衣敝不補履決不組君則不寒矣民則寒矣公曰善令罷役

飲酒益精明

原漢書于定國傳定國食酒至數石不亂冬月治請讞飲酒益精明

奏罷不時物

增漢書召信臣傳大官園種冬生葱韭菜茹覆以屋廡晝夜難蘊火待溫氣乃生信

臣以為此皆不時之物有傷於人不宜以奉供養悉奏罷

去酒省食

增漢書杜延年傳延年子緩為太常治諸陵縣每冬月封具獄日常去酒省食官屬稱其

有恩

煬竈

原淮南子貧人冬則羊裘解札短褐不掩形而煬竈口

豕膏塗身

增後漢書東夷傳挹婁古肅慎之國也土氣極寒常為穴居好養豕食其肉衣其皮冬以

豕膏塗身厚數分以禦風寒

解徒桎梏

原後漢書鍾離意傳意辟大司徒侯霸府詔部送徒詣河內時冬寒徒病不能行意遂於

道解徒桎梏恣所欲過與尅期俱至無或違者

溫室

增三輔黃圖溫室殿武帝建冬廬之溫暖也

寒荷

增洞冥記釣影山去昭河三萬里有雲氣望之如影有紫河萬里深十丈中有寒荷霜下方香盛

誦孝經論語

增邨原別傳原家貧早孤隣有書舍原過其旁而泣師曰童子苟有志我徒相教不

求資也於是遂就書一冬之間誦孝經論語自在童戲之中巍然有異及長金玉其行

方冬筍出

原楚國先賢傳孟宗母好食筍宗入林中哀號方冬為之出因以供養人皆以為孝感所

致

冰解鯉躍

原晉書王祥傳祥繼母常欲生魚時天寒冰凍祥解衣將剖冰求之冰忽自解雙鯉躍出

持之而歸鄉里驚嘆以為孝感所致焉

澤中董生

原晉書劉殷傳曾祖母王氏盛冬思董而不言食不飽者一旬矣殷怪而問之王言其故

殷時年九歲乃於澤中痛哭聲不絕者半日忽若有人云止止聲殷收淚視地便有董生焉因得斛餘而歸食而不減至時董生乃盡

梅橘冬實

原南史王虛之傳虛之庭中楊梅樹隆冬三實墓上橘樹一冬再實時人咸以為孝感所致

致

斷囚垂泣

原會稽典錄盛吉為廷尉每至冬月罪囚當斷其妻執燭吉持丹筆相向垂泣

賜冬柰

增曹植謝賜柰表即夕殿中虎賁宣詔賜臣等冬柰一奩詔賜使溫啖夜非食時而賜見及柰

以夏熟今則冬至物以非時為珍思以絕口為厚非臣等所宜荷之

冬月扇面

原晉書周顗傳王敦素憚顗每見顗輒面熱雖復冬月扇面手不得休

玄武黑殿

增晉書張駿傳謙光殿北曰玄武黑殿冬三月居之

澣衣披絮

原晉書吳隱之傳隱之遷左衛將軍雖居清顯祿賜皆班親族冬月無被嘗澣衣乃披絮

勤苦同於貧庶

衣單布

增晉書公孫鳳傳鳳字子鸞上谷人也隱於昌黎之九城山谷冬衣單布寢土牀彈琴吟詠陶

然自得

謝庭詠雪

增晉書列女傳王凝之妻謝氏字道韞安西將軍奕之女也聰識有才辯嘗內集俄而雪

驟下叔父安曰何所似也安兄子朗曰散鹽空中差可擬道韞曰未若柳絮因風起安大悅

冬袒不寒

原抱朴子菖蒲石上生一寸九節以上紫花者尤善韓終服之十三年身生毛日視書萬

言皆誦之
冬袒不寒

釀酒速成

原語林羊稚舒冬日釀酒令人抱甕須臾復易人速成而味好

素蓮

增拾遺記周穆王冬巡大騎之谷西王母來共王帳高會進崑流素蓮素蓮者一房百子凌冬而茂

獻筍

增竹譜廣志云魏時漢中大守王圖每冬獻筍俗謂之嚴筍

泉氣浮蒸

原荊州記新陽縣惠澤中有溫泉冬月未至數里遙望白氣浮蒸如烟上下來映狀若綺

欽定四庫全書

往定月令雜考

卷十七

三

疏

雨棗

增述異記魏世河內冬雨棗

無複衣

增宋書沈道虔傳道虔冬月無複衣戴顯聞而迎之爲作衣服并與錢一萬既還分身上衣及

錢供諸兄弟子無衣者

涌泉愈疾

增魏書靈徵志高祖興和元年冬西兗州濟陰郡宛句縣濮水南岸有泉涌出色清味甘

飲者愈疾

馬得龍種

原隋書吐谷渾傳青海周迴千餘里有小山其俗至冬輒放牝馬於其上言得龍種

襦袴賜凍者

增南史梁安成康王秀傳天監十三年爲郢州刺史每冬月常作襦袴以賜凍者

冬李

增南史王僧孺傳僧孺幼聰慧有儲其父冬李先以一與之僧孺不受曰大人未見不容先嘗

葛帔練裙

原南史任昉傳昉有子東里西華南容北叟兄弟流離不能自振生平舊交莫有收卹西

華冬月著葛帔練裙道逢平原劉孝標
泫然矜之乃著廣絕交論以譏其舊交

冬服單薄

正原南史顧協傳協少清介有志操初為廷尉卿蔡法度欲解襦與之憚其

清嚴不敢發口謂人曰我願解身上襦
與顧郎顧郎難衣食者竟不敢以遺之

冬生樹神光

原南史滕曇恭傳門外有冬生樹二株時忽有神光自樹而起俄見佛像及夾侍之

儀容光顯著自門而入曇恭
家人咸共禮拜久之乃滅

地氣冬溫

增舊唐書南蠻傳林邑國漢日南象林之地在交州南千餘里地氣冬溫不識冰雪常多

欽定四庫全書

卷十七

霧雨

敲冰煮茗

原開天遺事逸人王休居太白山下日與僧道異人往還每至冬時取溪水敲其精瑩者

煮建茗共
賓客飲之

煖玉鞞

增開天遺事岐王有玉鞞一面每至冬月則用雖天氣嚴寒則此鞞在上坐如溫火之氣

七寶硯鑪

原開天遺事內庫中有七寶硯鑪一所曲盡其功每至冬寒硯凍置於鑪上硯冰自消不

勞置火冬月
帝常用之

鳳炭

原開天遺事楊國忠家以炭屑用蜜捏塑成雙鳳至冬月然於爐中先以白檀木鋪於爐底餘灰不

可參
雜也

冬月致雷

增酉陽雜俎明皇嘗冬月召山人包超令致雷聲起對曰來日及午有雷遂令高力士監

之一夕黜式作法及明至已矣曾無纖翳力士懼之起曰將軍視南山當有黑氣如盤矣力士望之如其言有

頃風起黑氣滿漫疾雷數聲

却寒簾

原杜陽雜編同昌公主堂中設却寒簾類玳瑁斑有紫色云却寒之鳥骨所為也

旗亭畫壁

增集異記開元中詩人王昌齡高適王之渙齊名一日天寒微雪三詩人共詣旗亭賞酒

小飲忽有梨園伶官十數人登樓會宴俄有妙妓四輩尋續而至旋則秦樂皆當時之名部也昌齡等私相約曰我輩各擅詩名每不自定其甲乙今可密觀諸伶所謳若詩入歌詞之多者則為優矣俄而一伶拊節而唱乃曰寒雨連江夜入吳平明送客楚山孤洛陽親友如相問一片冰心在玉壺昌齡則引手畫壁曰一絕句尋

又一伶謳曰開篋淚霑臆見君前日書夜臺何寂寞猶
是子雲居適則引手畫壁曰一絕句尋又一伶謳曰奉
帚平明金殿開強將團扇共徘徊玉顏不及寒鴉色猶
帶昭陽日影來昌齡則又引手畫壁曰二絕句之渙自
以得名已久因謂諸人曰此輩皆潦倒樂官所唱皆巴
人下里之詞耳因指諸妓之中最佳者曰待此子所唱
如非我詩即終身不敢與子爭衡矣須臾次至雙鬟發
聲則曰黃河遠上白雲間一片孤城萬仞山羌笛何須
怨楊柳春風不度玉門關之渙即擲揄二子曰田舍奴
我豈妄哉因大諧笑諸伶皆起詣曰不知諸郎君何此
歡噱昌齡等因話其事諸伶競拜曰俗眼不識
神仙乞降清重俯就筵席三子從之歡醉竟日

獐人衣

增南越志獐人冬編
鵝毛雜木葉為衣

以水沃面

增宋史范仲淹傳仲淹少有志操既長依戚
同文學晝夜不息冬月憊甚以水沃面食不

給至以糜粥繼之人
不能堪仲淹不苦也

解衣裘

增宋史戚同文傳同文尚信義宗族閭里貧乏者周給之冬月多解衣裘與寒者不積財不營

居室深為
鄉里推服

雙角蛇

增清異錄丹陽鍾忠以元嘉冬月晨行見有蛇長二尺許文色似青琉璃頭有雙角白如玉感

而畜之自是
質業日登

冬蠶成繭

增太平御覽唐大厯中太原府清源縣人韓景輝養冬蠶成繭詔給復終身

海神移徙

增春明退朝錄歐陽少師言為河北都轉運使冬月按部至滄景間於野亭夜半聞車旂

兵馬之聲幾達旦不絕問宿彼處人
云是海神移徙五七年間一有之

龍門賞雪

增邵氏聞見前錄謝希深歐陽永叔官洛陽時同遊嵩山自潁陽歸暮抵龍門香山雪作

登石樓望都城各有所懷忽於烟靄中有策馬渡伊水來者既至乃錢相遣厨傳歌妓至吏傳公言曰山行良勞當少留龍門賞雪府事簡無遽歸也錢相遇諸公之厚類此

撒獸炭

原國老談苑太宗嘗冬月命撒獸炭左右或啟曰今日苦寒上曰天下民困是寒者衆矣朕何

獨溫
愉哉

蘇合香酒

增夢溪筆談王文正太尉氣羸多病真宗面賜藥酒一注瓶令空腹飲之可以氣血辟

外邪文正飲之大覺安健因對稱謝上曰此蘇合香酒也每一斗酒以蘇合香九一兩同煮極能調五臟却腹中諸疾每冒寒夙興則飲一杯因各出數盞賜近臣自此臣庶之家皆做為之此方本出廣濟方謂之白朮丸

水花

增夢溪筆談宋次道春明退朝錄言天聖中青州盛冬濃霜屋瓦皆成百花之狀又慶厯中集禧觀

渠中水紋皆成花果林木元豐末秀州人家屋瓦上冰亦成花每瓦一枝正如畫家所為折枝有大花似牡丹

芍藥者細花如海棠萱草者皆有枝葉無毫髮不具氣象生動雖巧筆不能為之以紙榻之無異石刻

春風膏硯

增物類相感志冬月令水不冰以楊花鋪硯槽名文房春風膏硯

車魚

增東京夢華錄賣生魚則用淺抱桶以柳葉間串清水中浸或循街出賣冬月即黃河諸遠處客魚

來謂之車魚每斤不上一百文

玻璆江

增吳船錄眉州城外即玻璆江也冬時水色如此

溫洛

增法帖刊誤今洛水冬月不冰古人謂之溫洛下有礬石取此石置甕水中水亦不冰

摸瘞竊銘

增秀水閒居錄瘞竊銘潤州揚子江焦山足石巖下惟冬序水退始可摸打世傳以為王

逸少書

幸溫泉宮

增雍錄溫湯在驪山西北咸亨三年名溫泉宮天寶六載改為華清宮於驪山上益治湯

井為池臺殿環列山谷開元間明皇每歲十月幸歲盡乃歸

五磚入直

增雍錄學士院北廳前有花磚道冬中日及五磚為入直之候李程性懶好晚入常過八

磚乃至衆呼為八磚學士

魚倉

原五色線青田溪冬天水熱如湯衆魚歸之名曰魚倉

陽河

增方輿記要陽河在薊州西五里亦名五里河源出城西鵝毛臺水性暖遇寒不冰故曰陽河

三冬境

增傳燈錄僧問如何是三冬境能和尚曰千峯添翠色萬樹鎖銀花

御製冬日重登清涼山詩紫府名山憶舊蹤招提駐蹕認

雲松陰崖尚有春時雪落日仍聽下界鐘塞遠渾河寒

更白林疎恒嶽翠逾重祝釐交叶人天慶銀榜新題徧

五峯

晉子夜冬歌

增白雪停陰岡丹華耀陽林何必絲與竹山水有清音又果欲結金蘭但看松柏林

經霜不墮地歲寒無異心

曹毗詠冬詩

增綿邈冬夕永凜厲寒氣升離葉向晨落長風振條興夜靜輕響起天清月輝澄寒

冰盈渠結素霜竟欄凝今
載忽已暮來紀奄復仍。

唐太宗冬日臨昆明池詩

增石鯨分玉溜劫燼隱平沙
柳影冰無葉梅心凍有花寒

野凝朝霧霜天散夕霞歡
情猶未極落景遽西斜

白居易負冬日詩

增杲杲冬日出照我屋南隅負暄閑
目坐和氣生肌膚初似飲醇醪又如

蟄者蘇外融百骸暢中適一念
無曠然忘忘所在心與虛空俱

朱子冬日詩

增蕭索時序晚已復度高秋回澗白波起
通川絳樹稠晨風散清霜嘉稻卷平疇獨

懷志士感歲事幸將休又清霜染澗樹蕭索向嚴冬密
雨有時集寒雲無定容波明橫瀨出風急遠林空一極

窓間眺高

畏羸亂峯

次三司互三言

御定月令解要

二六

御定月令輯要卷十七

欽定四庫全書

御定月令輯要卷十八

十月令

天道

月卦坤

增易坤上六龍戰于野集解侯果曰坤十月卦也乾位西北又當十月陰窮於亥窮陰薄陽所

以戰也干寶曰陰在上六月之時也爻終於西而卦成於乾乾體純剛不堪陰盛故曰龍戰

陽月

原詩曰歸曰歸歲亦陽止箋十月為陽時坤用事嫌於無陽故以名此月為陽爾雅十月為陽疏十

月得癸則曰極陽

定中

原詩定之方中作於楚宮集傳定北方之宿營室星也此星昏而正中夏至十月也於是時可以營室故謂之營室謂建亥小雪之中定星昏正於午土功可以始也

日在尾

原禮孟冬之月日在尾集說尾宿在寅析木之次

中星

原禮昏危中旦七星中淮南子註危北方玄武之宿七星南方朱鳥之宿

律中應鍾

原禮律中應鍾集說應鍾亥律長四寸七分寸之二十史記律書十月也律中應鍾

應鍾者陽氣之應不用事也淮南子應鍾之數四十二主十月上生蕤賓白虎通十月謂之應鍾何鍾動也言

萬物應陽而動下藏也

虹藏不見

原禮虹藏不見四時氣候藏伏也陰陽氣交而成虹此時陰陽極乎辨故虹伏虹非有質

而曰藏者亦言其氣之下伏爾

盛德在水

原禮先立冬三日太史謁之天子曰某日立冬盛德在水天子乃齊

閉塞成冬

原禮天氣上騰地氣下降天地不通閉塞而成冬

時有養夜

原夏小正時有養夜傳養長也

織女北向

原夏小正織女正北鄉則旦

南門見

原夏小正初昏南門見傳南門者星名也及此再見矣

天道在西北

增左傳襄公十八年十二月楚師伐鄭晉人聞有楚師董叔曰天道多在西北南師

不時必無功註歲在豕韋月又建亥故曰多在西北不

時謂觸歲月疏豕韋一名姬訾當亥之次也周十二月

夏之十月其月又建亥故曰多在西北

盈數

增左傳鄭伯自櫟入公父定叔出奔衛三年而復之使以十月八日良月也就盈數焉疏易云天一

地二天三地四天五地六天七地八天九地十是數滿於十也

大章

增史記天官書大淵獻歲歲陰在亥星居辰以十月與角亢辰出曰大章蒼蒼然星若躍而陰出旦

是謂正平起師旅其率必武其國有德將有四海其失次有應見婁

外黑內赤

增史記封禪書張蒼以為漢乃水德之始故河決金堤其符也年始冬十月色外黑內赤

註十月陰氣在外黑陽氣尚伏在地故內赤

招搖指亥

原淮南子孟冬之月招搖指亥增晉書樂志十月之辰謂為亥亥者勅也言時陰氣勅殺

萬物也

孟冬

原古詩玉衡指孟冬衆星何歷歷白露沾野草時節忽復易增張衡西京賦孟冬作陰寒風肅殺雨

雪飄

飆冰霜慘烈魏武帝步出夏門行孟冬十月北風

裴回天氣肅清繁霜霏霏鷗鷺晨鳴鴻鴈南飛蟄鳥潛

藏熊羆羆棲錢罇置農收積場逆旅

整設以通商賈幸甚至哉歌以詠志

羣陰畢升

增庾綏水并賦孟冬之月羣陰畢升霜雪紛其交淪流波結而成凌啟南墉之重隄將却

熱以藏冰

上冬

原梁元帝纂要十月孟冬曰上冬亦曰暢月

乾坤合居

增周易集解乾以君之荀爽曰謂建亥之月乾坤合居君臣位得也

顓帝歷首

增漢上易解連山首艮者八風始於不周實居西北之方七宿之次是為東壁營室於辰

為亥於律為應鍾於時為立冬此顓帝之歷所以首十月也

小春

增歲時事要十月天時和暖似春花木重花故曰小春歐陽修詞十月小春梅蕊綻

液雨

增歲時事要十月雨謂之液雨百蟲飲此而藏蟄俗呼為藥水

熱如六七月

增岳陽風土記岳州地極熱十月猶單衣或搖扇蛙鳴似夏鳥鳴似春濃雲疎星震

雷暴雨如中州六七月間

節序

立冬

增淮南子霜降加十五日斗指艸通之維則立冬

禮義宗十月立冬為節者冬終也

小雪

增淮南子立冬加十五日斗指亥則小雪音比無

雪故以小雪為中

迎冬北郊

增後漢書祭祀志立冬之日迎冬於北郊祭

命之舞

迎冬樂

增皇覽自秋分數四十六日則天子迎冬於北

旄尚黑田車載甲鐵鑿號曰助天誅唱之以羽舞之以干戈此迎冬之樂也

乾王

增京房易占立冬乾王不周風用事人君當興邊

崔憬曰立冬則乾王而陰陽相薄

析木之次

增月令章句自尾四度至斗六度謂之析木之次立冬小雪居之燕之分野

樂用杞啟

增樂緯乾主立冬樂用杞啟

讀時令

增南史齊武帝紀永明六年冬十月庚申立冬初臨太極殿讀時令

亥日祀

增唐書禮樂志立冬後亥日祀司中司命司人司祿

寒冰

增周易集解乾為寒為冰崔憬曰乾主立冬已後冬至已前故為寒為冰也

賜披襖

原中華古今註漢文帝以立冬日賜官侍承恩者及百官披襖子多以五色繡羅為之或以錦

為之始
有其名

溫帽

原中華古今註大帽子本巖叟野服也至魏文帝詔百官常以立冬日貴賤通戴謂之溫帽

千重襪

增清異錄唐制立冬日進千重襪其法以羅帛十餘層錦夾絡之

三素雲

增雲笈七籤立冬清旦西南望有綠紫青雲者是上清真人帝君皇祖三素雲也

定僊籙

增雲笈七籤立冬之日日中時陽臺真人會諸僊官玉女定新得道始入僊籙之人

風信

增田家雜占立冬前後起西北風謂之立冬信

雷陽臘祭

增通考雷陽人以立冬後己酉日為臘先祭其先後宴親故

夏侯湛苦寒謠

增惟立冬之初夜天慘慄以降寒霜皚皚以被庭冰澹頽於井榦草撼撼以踈

葉木蕭蕭以零殘松墮葉
於翠條竹摧柯於綠竿

徐鉉和蕭郎中小雪日詩

增征西府裏日西斜獨試新
爐自煮茶籬菊盡來低覆水

塞鴻飛去遠連霞寂寥小雪閑中過斑駁輕霜
鬢上加笄得流年無奈處莫將詩句祝蒼華

張登小雪日戲題絕句

增甲子徒推小雪天刺梧猶綠
槿花然融和長養無時歇却是

炎洲雨
露偏

日次

初一日

始朝賀

增史記始皇紀始皇推終始五德之傳以為周
得火德秦代周德從所不勝方今水德之始改

年始朝賀皆自十月朔衣服旌旌節旗皆上黑更名河曰德水以為水德之始

行養老禮

增後漢書明帝紀永平二年十月壬子幸辟雍初行養老禮詔曰間暮春吉辰初行大射

今月元日復踐辟雍尊事三老兄事五更註東觀記曰十月元日

登金路

增後漢書馬融廣成頌乘輿乃以十月之陽朔登於疏樓之金路註陽朔十月朔也疏樓謂雕

也樓

饗會如元正

增晉書禮儀志漢以高帝十月定秦且為歲首至武帝雖改用夏正然每月朔朝至

於十月朔猶常饗會如元正儀高適同羣公十月朝宴李太守宅詩良牧徵高賞褰帷問考槃歲時當正月甲

子入初寒

黍臠

原荆楚歲時記十月朔日黍臠俗謂之秦歲首注今北人此日設麻羹豆飯當為其始熟嘗新耳禍

衡別傳云十月朝黃祖在艤臠上會設黍臠是也

賜几杖

增通鑑魏文帝黃初二年十月己亥公卿朝朔旦并引楊彪待以客禮賜延年梧杖馮几

制舉試詩賦

增唐六典天寶十三載十月一日御勤政樓四科舉人問策外更試詩賦各一道制

舉試詩
自此始

收租

增宋史食貨志江南兩浙荆湖廣南福建土多杭稻須霜降成實自十月一日始收租

給錢收養

增宋史食貨志熙寧二年京師雪寒詔老幼貧疾無依丐者聽於四福田院額外給錢收

養至春稍暖則止九年韓絳言河東地寒乞自十月一日起支至次年二月終止從之

賜時服

增燕翼貽謀錄前代賜時服惟將相翰林學士至諸軍大校而止建隆三年太祖皇帝謂宰相

曰時服不賜百官甚無謂也宜并賜之乃以冬十月朔賜文武常參官時服自後遂為定制

作重九

增蘇軾十月朔吉菊始開乃與客作重九詩今日我重九誰謂秋冬交黃花與我期草中實後

彫注海南氣候不常有月即中秋有菊即重陽

朝饗陵墓

增東京夢華錄十月一日士庶皆出城饗墳禁中車馬朝陵亦如寒食節家禮集要韓魏

公以十月一日墓祭

賜紅錦袍

增玉海康定元年十月朔翰林學士賜對衣紅錦袍

牛接角

原神隱田家以糯糲糕安牛角上謂之牛接角仍以桑葉包糕餵牛以報一年之力其日撒放

不收又送糕於
親隣名曰慶牛

歲臘

增道經道家以十月一日為民歲臘三萬
六千神煞其日可謝罪祈求延年益壽

杜甫十月一日詩

原有瘴非全歇為冬亦不難夜郎溪
日暖白帝峽風寒蒸裏如千室焦糖

幸一梓茲辰南國
重舊俗自相歡

王建溫泉宮行

增十月一日天子來青繩御路無塵埃
宮前內裏湯各別每箇白玉芙蓉開朝

元閣向山上起城繞青山龍暖水夜
開金殿看星河宮女知更月明裏

初二日

幸太清觀

增玉海建隆三年十月
二日丙戌幸太清觀

塗渤表貢

增玉海慶歷八年十月二日南蕃塗渤國遣使奉表貢佛金骨真珠犀牛角象齒

後苑觀稻

增玉海元豐二年十月二日後苑觀稻

蘇軾十月二日初到惠州詩

增彷彿曾遊豈夢中欣然雞犬識新豐吏民驚怪坐

何事父老相攜迎此翁蘇武豈知還漠北管寧自欲老遼東嶺南萬戶皆春色會有幽人客寓公

初三日

銅儀成

增唐會要開元十三年十月三日癸丑新造銅儀成置於武成殿前以示百官

奉天書

增山堂考索宋真宗大中祥符五年十月三日奉天書於朝元殿恭謝上皇大帝聖祖配位在

東太祖太宗在西

觀山居圖

增玉海咸平六年十月三日己未對輔臣龍圖閣觀種放山居圖注放別業在終南林泉

幽勝帝命
畫工圖之

龍聚日

原道經十月三日四海三元龍王奏水府曰龍聚日

初四日

順時耀武

增玉海唐武德元年十月四日詔殺氣方嚴宜順天時耀威武可大集諸軍朕將臨校閱

進御筆

增玉海元祐六年十月四日三省進神宗御筆七十五策

初五日

奉藏禮神玉

增宋仁宗實錄皇祐二年十月五日詔禮神玉令少府擇寬潔之室奉藏

祀土德

增玉海太平興國八年十月五日祀土德於黃帝壇主幣牢具如大祠

初祖西歸

增傳燈錄師以化緣已畢傳法得人端坐而逝即後魏孝明帝太和十九年丙辰歲十月

五日也葬熊耳山起塔於定林寺後三歲魏宋雲奉使西域遇師於蔥嶺見手攜隻履翩翩獨逝雲問師何往

曰西天去

建生大會齋

增雲笈七籤十月五日名建生大會齋三官考覈功過依日齋戒可祈景福

初六日

注生籍

增道經十月六日天曹諸司五嶽五帝注生籍日

初七日

神僧預座

增法苑珠林宋路昭太后大明四年造普賢菩薩來寶鬘白象安於中興禪房因設講於

寺其年十月八日齋畢解座會僧二百人於時寺宇始捐帝輦蹕臨幸旬必數四僧徒勤整禁衛嚴肅忽有一僧預於座次風貌秀舉闔堂驚矚忽不復見列筵同覩識其神人矣

初九日

進列象拱極圖

增玉海至和元年十月九日庚子處州祥符宮言道士洞淵大師李思聰撰集

到璇霄列象拱極圖凡三而進納詔思聰特與進妙元先生名號

靈芝生

增玉海紹興二十五年十月九日周麟之言太廟生靈芝九莖連葉宜製華旗繪靈芝之形以

章偉績
奏可

韓維湖上十月九日詩

增斷橋孤嶼寒光外短檣輕舟
斜照中未必江湖能勝此野棠

梨葉赤
如楓

初十日

慶成節

增舊唐書文宗紀太和七年十月壬辰上降誕
日僧徒道士講論於麟德殿翼日宰相路隨等

奏誕日齋會誠資景福臣伏見開元十七年張說源乾
曜請以誕日為千秋節內外宴樂以慶昌期頗為得禮
上深然之宰臣因請十月十日為慶成節上誕日也從
之開成二年又勅慶成節宜令京兆尹准上已重陽例
於曲江會
文武大僚

天寧節

增宋史禮志徽宗以十月十日為天寧節春渚
紀間謝石成都人宣和間至京師以相字言人

禍福無不奇中者名間九重上皇因書一朝字令中貴人持往試之石見字以手加額曰朝字離之為十月十日字非此月此日所生之天人當誰書也一座盡驚中貴馳奏翼日召至後苑錫齊甚厚并與補承信郎

採決明子

增遵生八牋決明子主青盲又療唇口青色十月十日採陰乾百日可服

十一日

觀刈稻

增玉海天禧二年十月十一日召近臣於玉宸殿觀刈小香占城稻賜宴安福殿

書賜否泰卦

增玉海紹興五年十月十一日庚戌右相張浚入見上親書周易否泰卦賜之

太平盛事

增玉海紹興二十五年十月十一日禮部侍郎王珉等言贛州太平瑞木黎州甘露道州

連理木逆寧嘉禾鎮江瑞瓜南安雙蓮嚴信州芝草皆太平盛事請命有司圖狀製為華旗從之

十二日

遊佛迹院

增志林紹聖元年十月十二日與幼子過遊白水巖佛迹院浴於湯池熱甚其源殆可熟

物循山而東少北有懸水百仞山八九折折處輒為潭深者礧石五丈不得其所止雪濺雷怒可喜可畏水涯有巨人迹數十所謂佛迹也暮歸倒行觀山燒火甚俛仰度數谷至江山月出擊汰中流掬弄珠璧到家二鼓復與過飲酒食餘甘煮菜顧影頽然不復甚寐書以付過

黃雲捧月

增玉海嘉祐四年十月十七日司天言十二日廟中行禮月色皎然有黃雲捧月

奏捷稱賀

增玉海熙寧六年十月十二日熙河奏捷紫宸殿稱賀上解所服白玉帶賜宰臣

上壽

增東京夢華錄十月十二日宰執親王宗室百官入內上壽大起居

任伯雨述懷詩

增元符庚辰歲孟冬十二日任子丞大宗碌碌奉朝籍聖主訪落初聽言勞日

是諫路員有闕求人恐不及誰謂方遘選
邈迨首疎逖詔旨忽中授聞命但夕惕

十三日

謚六祖

增柳宗元曹溪六祖大鑒禪師碑扶風公廉問嶺南三年以佛氏第六祖未有稱號疏聞於上

詔謚大鑒禪師塔曰靈照之塔元和十年十月十三日
下尚書祠部符到都府公命部吏告於其祠幢蓋鐘鼓

增山盈谷萬人咸會若聞鬼神

唐代宗生

增柳氏舊聞肅宗吳皇后侍寢不寤吟呼若
有痛苦氣不屬者肅宗呼之不解秉燭視之

良久乃寤問之后以手按其左脇曰妾夢神人長丈餘
介金甲操劍顧謂妾曰帝命吾與汝為子自左脇以劍

欽定四庫全書

御定月令輯要

決而入痛不可忍今未已也肅宗驗之於燭下則若有
繼而赤者存焉遂以十月十三日生代宗揮麈前錄唐
代宗十月十三日天興節見令狐綯集玉海代宗誕日
于邵降誕頌曰甲觀畫堂繞樞神光十月良月降生我
皇舜膳以甘堯樽以酣誕彌之期旬而有三又唐代宗
誕辰有慶雲見常袞賀表曰十月良月遠膺盈數之期
後天奉天迤和元之虹影雜繞樞之電

河復

增蘇軾河復詩敘熙寧十年秋河決澶淵注鉅野
入淮泗自瀆魏以北皆絕流而濟楚大被其害彭

門城下水二丈八尺七十餘日不退吏民疲于守禦十
月十三日澶州大風終日既止而河流一支已復故道

聞之喜甚庶幾可
塞乎乃作河復詩

慶成飲福

增玉海皇祐二年十月以大饗慶成十三日
賜飲福宴於集英殿上舉觴屬羣臣畢酌曰

與卿等均受其
福酒九行罷

御製昭君墓詩并序

匈奴梗化邊陲自周秦漢唐無代不有頃朕於春夏親
統六師破厄魯特噶爾丹於克魯倫河西北復於秋九
月西巡由張家口出塞撫察我邊鄙厄魯特敗殘之衆
降者踵至其頭目來歸者咸與近職開誠示信絕無猜
疑冬十月十三日至歸化城為我兵屯戍之所城南十
餘里土阜突然傳為昭君墓即志所云青冢也昔有不

得志於功名或身遭遷謫往往託昭君怨而為詩以寫其抑鬱則在當日之怨極而悲又不知何如此冢之留茲土適足為漢譏焉我國家輿圖遠大遐邇諸部落世世臣屬奔走不暇凡有驅策如臂之使指甘為僕婢而不辭恒自緬懷前烈敢不慎修思永夫昭君墓何足詠也因之有感於治理遂成八韻

南北分天地存亡見廟謨含悲辭漢主揮淚赴匈奴目覩當年冢心懷四海圖葆旌巡遠徼蕃落効馳驅欲笑

和親失還嫌餌術迂

漢賈誼策言用五術以餌匈奴

開誠示異族布化

越荒途漠漠龍沙際寥寥雁塞隅偶吟因有觸意獨與

人殊

十四日

刊正羣書

增唐會要乾封元年十月十四日上以四部羣書傳寫訛謬乃詔東臺侍郎趙仁本兼蘭

臺侍郎李懷嚴兼東臺舍人張文瓘等集儒學之士刊正然後繕寫

十五日

下元節

增搜米異聞錄太平興國五年十月下元京城始張燈如上元之日玉海雍熙三年十月庚戌

下元節宴輔臣於樞密使王顯
第夜分就賜御製雜言一篇

上天源錄

增玉海祥符八年十月十五壬辰日知
制誥盛度上聖祖皇帝天源錄五卷

望祭木葉山

增遼史禮志歲十月五日天子與羣臣望祭
槍刀器械萬副十五日天子與羣臣望祭

木葉山用國字書狀并焚之
謂之達勒噶喀國語曉也

校定罪福

原正一修真旨要下元九江水帝十二河源
溪谷大神賜谷神王水府靈官同下人間校

定罪福

蘇軾後赤壁賦

原是歲十月之望步自雪堂將歸於臨
臯二客從予過黃泥之坂霜露既降木

葉盡脫人影在地仰見明月
顧而樂之行歌相答

蘇軾十月十五日觀月黃樓詩

增中秋天氣未應殊不用紅紗照坐隅山下白

雲橫匹素水中明月卧浮圖未成短棹還憶使君無輕舟泛五湖為問登臨好風景明年還憶使君無約

十六日

盤古氏生日

增路史荆湖南北以十月十六日為盤古氏生日

麟見

增玉海唐高宗龍朔三年十月十六日絳州介山麟見

茅灘大閱

增玉海乾道四年戊子十月十六日甲辰幸茅灘大閱前一日於教塲東列幕宿營皇帝

登臺舉黃旗變諸軍呼拜者三舉白旗變方陣為避敵之形舉黃旗變圓陣為自環內固之形舉赤旗變銳陣諸軍魚貫斜列為衝敵之形舉青旗變直陣上親御甲冑指授方畧歡呼犒賞有加焉上謂王逵曰軍律整肅卿

之力也

寒婆生日

增農政全書十月十六日為寒婆生日晴主冬暖

天倉開

增遵生八牋十六日天倉開宜入山修道

十七日

觀五經圖

增玉海咸平五年十月十七日幸龍圖閣觀五經圖賜宴

建辟雍

增玉海崇寧元年十月十七日戊辰初建辟雍外圓內方為屋一千八百七十二楹宰臣言奉

詔天下立學官貢士仍建外學於王國之南待其歲攷行藝升之太學增上舍二百人內舍六百人處上舍內舍於太學處外舍於外學

十八日

遊棲霞寺

增江總入攝山棲霞寺詩序壬寅年十月十八日入攝山棲霞寺登崖極峭頗暢懷抱

改造斛斗尺稱

增唐會要大厯十一年十月十八日太府少卿韋光輔奏請改造銅斗斛尺稱

等行用

閱試武藝

增玉海熙寧六年十月十八日親閱軍校兵士試武藝賜銀有差上厲精武事訓肄有法

每旬一御後殿程能否而
勸沮之不數月兵氣一新

十九日

天祐節

增宋史禮志寧宗以十月十九日為天祐節

修洛陽宮室

增王仁珪李仁祚焦繼勲同修洛陽宮室

嘉禾曲

增王海乾德四年京兆果州進嘉禾

會經日

增藏經十月十九日

二十日

月如望夕

增近異錄宋慶元二年十月二十夜三更後

團圓如望夕太史奏是為

配食武成王

增王仲召虎方叔吉甫尉繚配食武成王廟

二十一日

名慈寧宮

增楓憲小牘紹興九年十月二十一日詔皇太后宮殿名慈寧

觀指南車

增玉海皇祐五年十月二十一日御延和殿召輔臣觀指南車

二十二日

八關齋

增支遁八關齋詩序間與何驃騎期當為合八關齋以十月二十二日集同意者在吳縣土山

下三日清晨為齋始道士白衣凡二十四人清和肅穆莫不靜暢

會慶節

增宋史禮志孝宗以十月二十二日為會慶節玉海孝宗時陳良祐因會慶節撫唐太宗事百

二十條議其當否目曰會慶萬年金鑑錄上之

宴京畿父老

增玉海皇祐二年十月以大饗慶成二十日乙亥宴京畿父老百五十人於錫慶

欽定四庫全書

法苑珠林卷十八

十七

院

二十三

授慧印三昧經

增弘明集梁有廣州南海郡人何規以天監十四年十月二十三日採藥於豫

章胡翼山遇一僧手提書一卷授規
規開視卷內題名為慧印三昧經

觀御書碑

增玉海熙寧元年十月二十三日召輔臣觀御書英德殿碑於迎陽門

二十四

封祀玉牒

增宋封祀玉牒文維大中祥符元年歲次戊申十月戊子朔二十四日辛亥有宋嗣天子

臣敢昭告於昊天上帝啟運大同惟宋受命太祖開階
功成治定太宗膺圖重熙累盛粵以冲人丕承列聖寅

恭奉天憂勞聽政一紀於茲四隅來暨玄貺殊尤禎符
章示儲慶發祥清淨可致時和年豐羣生咸遂爰荷顧
懷敢忘繼志僉議大封聿仲昭事躬陟喬嶽對越上元
率禮祇肅備物吉蠲以仁守位以孝奉先祈福逮下侑
神昭德惠綏黎元懋建皇極天祿無
疆靈休允迪萬乘其昌永保純錫

二十五日

送金像

增江總入攝山棲霞寺詩序甲辰年十月二十
五日奉送金像還山限以時務不得恣情淹留

天符節

增宋史禮志政和三年以
十月二十五日為天符節

二十六日

冬至麥秀

增西域志天竺國以十月二
十六日為冬至冬至則麥秀

施菩薩戒

增江總入攝山棲霞寺詩序至德元年癸卯十月二十六日又再遊此寺慧布法師施菩

薩戒

禱雨張龍公

增東坡詩話元祐六年十月二十六日禱雨張龍公會景貺履常二歐陽子作詩云

夢回聞剝啄誰乎趙陳子景貺拊掌曰句法甚新前人未有此法季默曰有之長官請客吏請客目曰主簿少府我即此語也

東封禮成

增玉海皇朝祥符元年十月二十六日東封禮成御朝覲壇肆赦少府監所設金雞送山

下其竿盤木馬夾耳等物下經度制置使製造

二十七日

廣獻書路

增王海咸平四年十月二十七日甲子日詔曰國家設廣內石渠之宇訪羽陵汲冢之書廣

獻書之路每卷給千錢三百卷以上量才錄用

進易解

增王海紹興十五年十月二十七日劉翔進易解

二十八日

周師東行

原國語昔武王伐殷歲在鶉火月在天馬日在析木之津注歲歲星也鶉火次名謂武王

始發師東行時殷之十一月二十八日戊子於夏為十月是時歲星在張十三度張鶉火也天馬房星也謂戊

子日月宿房五度津天漢也析木次名謂戊子日宿箕七度

應靈郡

增雲笈七籤至德二年十月二十八日詔曰江油舊壤境帶靈山自狩已梁屢昭感應眷茲郡

欽定四庫全書

御定月令輯要

十九

邑合有增崇可昇龍州
為都督府賜號應靈郡

二十九日

祠華嶽

增唐會要武德二年十月二十九日甲子親祠華嶽

翠芳亭觀稻

增宋史禮志咸平四年十月二十九日詔宗室近臣諸帥赴玉宸殿翠芳亭觀稻賜

宴仍以稻分賜之

三十日

顏生卜娠

增北史顏惡頭傳惡頭妙於易筮遊州市觀卜有婦人負囊粟來卜歷七人皆不中而強

索其粟惡頭尤之卜者曰君若能中何不為卜惡頭因筮之曰登高臨下水洞洞惟聞人聲不見形婦人曰娠

身已七月矣向井上汲水忽聞胎聲故卜惡頭曰吉十月三十日有一男子詣卜者乃驚服曰是顏生耶相與謝焉

具羊酒

佛照光偈

增貴耳錄陳習菴名頃省元父母求子於佛照光禪師就上寫一偈末後二句云諸佛菩

提齊着力只今生箇大男兒此十月三十日書至十二月三十日習菴生父母乞名於佛照光曰覺老余親見其狀習菴無髻有則去之凡有除目即先夢見住院前自即一尊宿也

政典

入澤梁

增禮獺祭魚然後虞人入澤梁疏案月令正月獺祭魚獺一歲再祭此獺祭魚謂十月時

入山林

增禮草木零落然後入山林疏謂十月時案月令季秋草木零落其零落芟折則在十月也

玄堂左个

原禮孟冬之月天子居元堂左个注元堂左个北堂西偏也

命太史

原禮是月也命太史釁龜筮占兆審卦吉凶注周禮龜人上春釁龜謂建寅之月也秦以其歲

首使太史釁龜筮與周異矣

始裘

原禮是月也天子始裘集說周禮季秋獻功裘至此月乃衣之也增唐書李程傳德宗季秋出畋有

寒色顧左右曰九月猶衫二月而袍不為順時朕欲改月謂何左右稱善程獨曰明皇著月令十月始裘不可改

謹蓋藏

原禮命百官謹蓋藏注謂府庫困倉有財物

斂積聚

原禮命司徒循行積聚無有不斂注謂芻禾薪蒸之屬

命工師

原禮是月也命工師効功陳祭器按度程注霜降而百工休至此物皆成也効功錄見百工所

作器物也主於祭器祭器尊也度謂制大小也程謂器所容也

大飲烝

原禮是月也大飲烝注十月農功畢天子與其諸侯羣臣飲酒於大學以正齒位謂之大飲別

之於他其禮亡今天子以燕禮郡國以鄉飲酒禮代之

祈來年

原禮天子乃祈來年於天宗注此周禮所謂蜡祭也天宗謂日月星辰也增山堂考索月令孟

冬祈於天宗盧植注云天宗六宗之神李邵謂六宗上不及天下不及地旁不及四方在六合之中

講武

原禮天子乃命將帥講武習射御角力注為仲冬將大閱簡習之亦因營室主武士也增唐書王綝

傳武后欲季冬講武有司不時辦遂用明年孟春綝曰按月令孟冬天子命將帥講武習射御角力此乃三時

務農一時講武安不忘危之道今孟春講武以陰政犯陽氣害發生之德願陛下不違時令前及孟冬以順天道

收賦

池澤之賦註因盛德在水虞漁師收水泉

大蜡

增禮天子大蜡八伊耆氏始為蜡蜡也者索也歲十二月合聚萬物而索饗之也註歲十二月周之

正數謂建亥之月也

正齒位

原周禮地官黨正國索鬼神而祭祀則以禮屬民而飲酒於序以正齒位註國索鬼神而祭祀

謂歲十二月大蜡之時建亥之月也正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者為民三時務農將闕於禮至此農隙而教之尊長養老見孝悌之

道也

獻民數

原周禮秋官小司寇孟冬祀司民獻民數於王

轅角也小司寇於祀司民而獻民數於王重民也進退
猶損益也國用民衆則益民寡則損增通典古之為理
在周知人數乃均其事役周官有比閭族黨鄉遂之制
維持其政綱紀其人孟冬獻民數於王王拜受之其敬
之守之如此其重也如

行飲酒禮

增儀禮鄉飲酒之禮註今郡國十月行此
飲酒之禮疏周謂之禮註今郡國十月行此

行燕禮

增儀禮燕禮注燕於路寢相親
昵也今辟雍十月行此燕禮

城諸及防

增春秋莊公二十有九年冬十有二月城諸
及防疏諸君邑防臣邑言及別君臣之義

均利器用

增國語六間應鍾均利器用俾應復也注十月曰應鍾坤六三也言陰應陽用事萬物鍾

聚百嘉具備時務均利百官器用程度庶品使皆應其禮復其常也

火朝覲

增國語單襄公假道於陳以聘於楚火朝覲矣道弗不可行也注火心星也覲見也朝見謂夏

正十月晨見於辰

成梁

原國語十月成梁增孟子十二月與梁成注周十二月夏十月可以成與梁也

繫牛牧馬

增王居明堂禮孟冬之月命農畢積聚繫牛牧馬

麟遊靈時

增司馬相如封禪文濯濯之麟遊彼靈時孟冬十月君徂郊祀馳我君與帝以享祉

官司馬

原淮南子官司馬注冬間講武故官司馬

秦歲首

原史記高祖紀至霸上注以高祖十月至霸上故因秦以十月為歲首漢書任敖傳漢興二十

餘年天下初定公卿皆軍吏蒼為計相時緒正律歷以高祖十月始至霸上故因秦時本十月為歲首不革推

五德之運以為漢當水德之時上黑如故吹律調樂入之音聲及以比定律令

朝獻

增漢書高帝紀十一年詔曰欲省賦甚今獻未有程吏或多賦以為獻而諸侯王尤多民疾之令諸

侯王通侯常以十月朝獻及郡各以其口數率人歲六十三錢以給獻費

孝文廟樂

增漢書景帝紀元年冬十月詔曰蓋聞古者祖有功而宗有德制禮樂各有由歌者所以

發德也舞者所以明功也高廟酎奏武德文始五行之舞孝惠廟酎奏文始五行之舞孝文皇帝臨天下德厚侔天地利澤施四海靡不獲福明象乎日月而廟樂不稱朕甚懼焉其為孝文皇帝廟為昭德之舞以明休德

然後祖宗之功德施於萬世永永無窮朕甚嘉之其與丞相列侯中二千石禮官具禮儀奏

除賦加帛

增漢書武帝紀元封元年詔曰朕登封泰山至於梁父然後升禮肅然自新嘉與士大夫

更始其以十月為元封元年行所巡至博奉高蛇丘歷城梁父民田租逋賦貸已除加年七十以上孤寡帛人

二匹四縣無出今年算賜天下民爵一級女子百戶牛酒

朝儀

原漢書叔孫通傳漢七年長樂宮成諸侯羣臣朝十月儀先平明謁者治禮引以次入殿門廷中陳

車騎戍卒衛官設兵張旗志傳曰趨殿下即中俠陛陞數百人功臣列侯諸將軍軍吏以次陳西方東鄉文官

丞相以下陳東方西鄉大行設九賓臚句傳於是皇帝輦出房百官執戟傳警引諸侯王以下至吏六百石以

次奉賀自諸侯王以下莫不震恐肅敬至禮畢盡伏置法酒諸侍坐殿上皆伏抑首以尊卑次起上壽觴九行

謁者言罷酒御史執法舉不如儀者輒引去竟朝置酒
無敢譴諱失禮者於是高帝曰吾乃今日知為皇帝之
貴也注漢時尚以十月為正月
故行朝歲之禮史家追書十月

優復元氏

增後漢書明帝紀永平五年冬十月行幸鄴常山三老言於帝曰上生於元氏願蒙優復

詔曰豐沛濟陽受命所由加恩報德適其宜也今永平之政百姓怨結而吏人求復令人愧笑重逆此縣之拳
拳其復元氏縣田租更賦六
歲勞賜縣掾吏及門闌走卒

行迎氣樂

增後漢書章帝紀建初五年始行月令迎氣樂注東觀記曰馬防上言聖人作樂所以宣

氣致和順陰陽也臣愚以為可因歲首發太族之律奏雅頌之音以迎和氣時以作樂器費多遂獨行十月迎
也
氣樂

改斷獄期

增後漢書陳寵傳帝敬納寵言每事務於寬厚是後人俗和平屢有嘉瑞漢舊事斷獄報

重常盡三冬之月是時帝始改用冬初十月而已

祫祭

增後漢書張純傳祫祭以冬十月冬者五穀成熟物備禮成故合聚飲食也

用禋柿

增范汪祠制孟冬祭用禋柿

班俸制

增魏書高祖紀太和八年詔曰俸制已立宜時班行其以十月為首每季一請於是內外百官

受祿有差

導人德義

增北史魏孝文帝紀太和十一年冬十月甲戌詔曰孟冬十月人開歲隙宜於此時導以

德義可下諸州黨里之內推賢而長者教其里人父慈子孝兄弟順夫和妻柔不率長教者具以名聞

祭司寒

增唐書禮樂志
孟冬祭司寒

選人會省

增唐書選舉志每歲五月頒格於州縣選人應格則本屬或故任取選解列其罷免善惡

之狀以十月會於省過其時者不叙其以時至者乃考其功過同流者五為聯京官五人保之一人識之刑家之子工賈異類及假名承偽隱冒升降者有罰文書粟錯隱倖者駁放之非隱倖則不

三旬會集

增唐六典軍衛武官選授之制每歲孟冬以三旬會其人去王城五百里集於上旬千里

之內集於中旬千里之外集於下旬

徧祀山川

增通典後魏景穆帝立五嶽四瀆廟於桑乾水之陰春秋遣有司祭其山川諸神三百二

十四所每歲十月遣祠官詣州鎮徧祀

熟羌互市

增白帖金部格云敕松當悉維翼等州熟羌每年十月已後即來彭州互市易法時差上

佐一人於蠶崖關外依市法至市場交易勿令百姓與往還

賜從官

增宋史真宗紀大中祥符元年十月甲寅次太平驛賜從官辟寒凡花茸袍

給公券

增燕翼詒謀錄開寶二年十月丁亥詔西川山南荆湖等道所薦舉人並給來往公券令樞密

院定例施行蓋自初起程以至還鄉費皆給於公家

合祭羣神

增山堂考索後周以十月祭神農伊耆以下至毛介等神於五郊五方天地星宿四靈五

帝五官嶽鎮下至原隰各分其方合祭之

立聽訟觀

增通鑑綱目太和三年十月立聽訟觀置律博士

賜刑統

增玉海端拱二年十月詔賜宰臣執政刑統各一部詔中外臣僚常讀律書

乾元歷成

增玉海太平興國七年十月己卯司天冬官正吳昭素及雷內直苗守信造成新歷凡律

經二卷記晨昏分一卷日躔陰陽經一卷日出入刻一卷晝夜刻分一卷五更中星一卷共七卷以獻上命衛

尉少卿元象宗集本監明律歷者同校定賜號乾元歷上自製序

選人入館校書

增玉海祥符八年十月丙午命吏部取選人先試判擇可者選學士院試詩賦

論命入館校勘書籍三年改官

禱天雪霽

增遼史太祖紀神冊四年冬十月丙午次烏古部天大風雪兵不能進上禱於天俄頃而

霽

劉禹錫洛中初冬拜表有懷上京故人詩

增鳳樓南面

即官早渡橋清洛曉光鋪碧簾上陽霜葉剪紅綃省門簪組初成列雲路鴛鴦想退朝寄謝慙勤九天侶搶榆

水擊各逍遙

民用

備寒

原詩穹室熏鼠塞向墜戶傳穹窮室塞也向北出牖也墜塗也庶人革戶簔為此四者以備寒

獲稻為酒

原詩十月獲稻為此春酒以介眉壽傳春酒凍醪也疏獲稻為酒唯助養老

納禾稼

原詩十月納禾稼黍稷重穆禾麻菽麥箋納內也治於場而內之囤倉也疏十月之終納禾稼

之所收穫者黍稷重穆禾麻菽麥之等納之於囤倉之中

滌場饗酒

原詩十月滌場朋酒斯饗曰殺羔羊躋彼公堂稱彼兕觥萬壽無疆箋十月民事男女俱

畢無飢寒之憂國君閒於政事而饗羣臣增韓維送寧極還山詩場功十月畢田家足幽事

日月會龍虬

原國語日月會於龍虬土氣含收天明昌作百嘉備舍羣神頻行國於是乎烝嘗家

於是乎嘗祀百姓夫婦擇其令辰奉其犧牲敬其蠶盛潔其糞除慎其采服禋其酒醴帥其子姓從其時享虔其宗祝道其順辭以昭祀其先祖注虬龍尾也謂周十二月夏十月也日月合辰於尾音義虬關侯反

草端大月

原呂氏春秋草端大月陳士元農書音釋端專眩二音相貴也草端義未詳或作端始萌

也大月高注孟冬月也秦以亥月為歲首故稱大月猶正月一月也又易卦陽大陰小爾雅十月為陽大月即

陽月之義

孟冬之位

原詩含神霧唐地處孟冬之位得常山大岳之風音中羽其地磽确而收其民儉而好蓄

此唐堯之所處

作脯

增四民月令十月作脯以供臘祀風俗通俗說膊大脯也案太山博縣每歲十月祠太山脯濶一尺

長五寸

亥日食餅

增雜五行書十月亥日食餅令人無病

入學

增齊民要術十月農事畢令成童入大學如正月焉陸游詩三冬暫就儒生學千耦還從父老耕識

字粗堪供賦役不須辛苦慕公卿

布菜種

增齊民要術十月中於牆南日陽中掐作坑深四五尺取雜菜種別布之一行菜一行土去坎

一尺
便止

釀冬酒

原齊民要術十月上辛
命典饋麴釀冬酒

栽石榴

增齊民要術栽石榴法十月中
以藁裹而纏之不裏則凍死

蜜薑

增齊民要術用生薑淨洗削治十月酒
糟中藏之泥頭十日熟出水洗內蜜中

收蜀芥雲臺

增齊民要術十月收蕪菁訖時收
蜀芥雲臺足霜乃收不足霜即澀

區種茄子

增齊民要術種茄子法十月種者如
區種瓜法推雪著區中則不須栽

區種瓜

增齊民要術冬瓜越瓜瓠子十月區種如區種
瓜法冬則推雪著區上為堆潤澤肥好乃勝春

種

欽定四庫全書

御定月令輯要

三

金匱要略卷十八
叢荷

增齊民要術叢荷宜在樹陰下種之十月終以穀麥種覆之

散葵子

增齊民要術種葵十月末地將凍散子勞之入足踐踏之乃佳

收胡荽

增齊民要術胡荽十月足霜乃收之取子者仍留根間拔令稀以草覆

上時春酒

增齊民要術造酒法用黍米麴一斗殺米一石秫米令酒薄不任事治麴必使表裏四畔

孔內悉皆淨削然後細判令如棗栗曝使極乾一斗麴用水一斗五升十月桑落初凍則收水釀者為上時春酒

槐子

增名醫別錄槐子以十月己日采相連多者新盆盛合泥百日皮爛為水核如大豆服之令人腦滿

髮不白而長生圖經本草十月上己日取槐子去皮納新瓶中封口二七日初服一枚再服二枚日加一枚至

十日又從一枚起終而復始令人可夜讀書

遂陽熟

增名醫別錄遂陽木味甘無毒主益氣生

雲實

增名醫別錄雲實一名雲英主治

神仙葉

增圖經本草桑葉可常服神仙服食方以四月

一分在者名神仙葉即採取與前葉同

里社

蜡原事物紀原禮雜記曰子貢觀於蜡子曰百日之

則黨正以禮屬民而飲酒勞農而休息之使之燕樂是

君之澤也今賽社則其事爾今人以歲十月農功畢里

社致酒食以報田神因相與飲樂世謂里社始於周人

之蜡云增路史每歲陽月盍百種萃萬民蜡戲於國中

御定月令輯要

野蠶成繭

增玉海唐文宗開成二年十月陳許奏野蠶自生桑上三遍成繭連綿九十里百姓以為

絲綿綢絹又嘉祐五年十月
深州言野蠶成繭被於原野

女貞實

增簡便方女貞實久服髮白再黑返老還童用十月上己日收陰乾用

牛蒡脯

增山家清供牛蒡脯孟冬采根去皮淨洗煮槌匾壓以鹽醬茼蘿薑椒熟油諸料研細火焙乾

食之如肉
脯之味

粬粬

增山家清供杜甫十月一日有粬粬作人情之句考楚辭粬粬蜜餌粬粬乃蜜麪之乾也十月開爐

餅也

無患子

增本草綱目無患子名菩提子十月採實煮熟去核搗和麥麪作澡藥去垢同於肥皂用洗真

珠甚妙

夜作

增田家雜占十月天寒日短必須夜作諺云十月無工只有梳頭吃飯工

鵝毛被

增山堂肆考邕管溪峒風俗以十月取鵝之軟毛為被以禦寒故柳宗元峒氓詩有鵝毛禦臘

縫山巖之句

木奴著裘

增岩棲幽事山中人為木奴著裘草縛柑橘樹上曰為木奴著裘

溫養神氣

增遵生八牋孟冬之月天地閉藏水凍地坼早卧晚起必候天曉使至溫暢無泄大汗勿

犯冰凍雪積溫養神氣無令邪氣外入生氣在酉坐卧宜向西方

杜甫孟冬詩

原殊俗還多事方冬變所為破柑霜落爪嘗稻雪翻匙巫峽寒都薄烏蠻瘴遠隨終

欽定四庫全書

雅宜月令輯要
卷十八

三

然減灘瀨暫
喜息蛟螭

趙孟頫十月耕詩

增孟冬農事畢穀粟既已藏彌望四
野空藁枯亦在場朝廷政方理庶事

和陰陽所以頻歲登不憂旱與蝗置酒宴鄉里尊老列
上行肴羞不厭多魚羔復烹羊縱飲窮日夕為樂殊未

央禱天祝聖人
萬年長壽康

趙孟頫十月織詩

增豐年禾黍登農心稍逸樂小兒漸
長大終歲荷鋤鑿目不識一字每念

心作惡東鄰方迎師收拾令上學後月南至相賀因
舊俗為女裁新衣修短巧量度龜手事塞向庶禦北風

虐人生真可歎
至老常力作

物候

隕擇

原詩十月隕擇傳隕墜擇落也疏十月木葉皆隕落也

蟋蟀

原詩十月蟋蟀入我牀下疏蟲既近人大寒將至

冰凍

原禮水始冰地始凍

雉為蜃

原禮雉入大水為蜃註大水也大蛤曰蜃

黑鳥浴

原夏小正黑鳥浴傳黑鳥也浴者飛乍高乍下也

豺祭獸

原夏小正豺祭獸傳善其祭而後食之也禮豺祭獸疏按月令九月豺乃祭獸夏小正十月豺

祭獸

則是九月末十月之初豺祭獸之後百姓可以田獵

人氣在心

原素問十月陰氣始冰地氣始閉人氣在心

香草生

增史記司馬相如傳揭車衡蘭豪本射干註郭璞曰揭車一名乞與豪本射干十月生皆香草

樹檀

增淮南子十月其樹檀註檀陰木

東牆熟

增後漢書烏桓傳其土地宜稼及東牆東牆似蓬草實如稭子至十月而熟

枳柜

增齊民要術廣志曰枳柜葉似蒲柳子似珊瑚其味如蜜十月熟樹乾者美出南方邛郫大如指

龍蛇蟄

增周易集解龍蛇之蟄以存身也虞翻曰龍潛而蛇藏陰息初巽為蛇陽息初震為龍十月坤

成十一月復生垢巽在下龍蛇俱蟄初坤為身故龍蛇之蟄以存身

放鷹

增白居易放鷹詩十月鷹出籠草枯雉兔肥下韝隨指顧百擲無一遺鷹翅疾如風鷹爪利如錐本

為鳥所設今為人所資

取解

增唐彦謙解如虎扳罾拖網湖田十月清霜墮晚稻初香

梅花

增盧僊十月梅花詩已鄉氣候與華別年年十月

南中感懷詩南路蹉跎客未回常嗟物候暗相催四時
不變江頭草十月先開嶺上梅僧善住詩清霜欲重小
春天楊柳蕭疎帶晚煙無奈東
皇苦多事又傳春信到梅邊

蒟藿子

增本草衍義蒟藿花白子初
青如綠豆顆十月方熟紅

貝母

增本草綱目貝母生晉地十月采根暴乾詩
云言采其苕即此一作蜚謂根狀如蜚也

鼠穴榛寶

增昌平山水記黃花鎮有鼠色如鼯而毛淺
初冬掇榛寶貯穴中為岐洞貯之多鼯至二三

斗美好倍於人所收
者土人每掘取之

十月牡丹

增楓窻小牘淳化三年冬十月太平興國寺牡丹紅紫盛開帝京景物畧右安門外南十

里草橋北土近泉宜花居人以種花為業冬則溫火暄之十月中旬牡丹已進御矣

白居易早冬詩

增十月江南天氣好可憐冬景似春華霜輕未殺萋萋草日暖初乾漠漠沙老

柘葉黃如嫩樹寒櫻枝白是狂花此時却羨閑人醉五馬無由入酒家

占驗

愆候

原禮孟冬在春令則凍閉不密地氣上泄民多流亡注寅之氣乘之也又行夏令則國多暴風方冬

不寒蟄蟲復出注己之氣乘之也又行秋令則雪霜不時小兵時起土地侵削注申之氣乘之也

霜不殺草

增春秋僖公三十有三年十有二月實霜不殺草李梅實公羊傳何以書不時也注周之

十二月夏
之十月也

尾伏火中

原左傳僖公五年八月甲午晉侯圍上陽問於卜偃曰吾其濟乎對曰克之公曰何時對

曰童謠云丙之晨龍尾伏辰均服振振取虢之旂鶉之賁賁天策焯焯火中成軍虢公其奔其九月十月之交乎丙子旦日在尾月在策鶉火中必是時也冬十二月丙子朔晉滅虢虢公醜奔京師注龍尾尾星也日月之會曰辰日在尾故尾星伏不見鶉火星天策傳說星交晦朔交會是夜日月合朔於尾月行疾故至旦而過在策周十二月夏之十月

蠛不當見

增公羊傳蠛注蠛者與陰殺俱藏周十二月夏之十月不當見故為異

木火土金聚

增北齊書神武紀普泰元年十月歲星熒惑鎮星太白聚於觜參色甚明太史占云

欽定四庫全書

御定月令輯要

三

當有王者興是時
神武起於信都

春糴占

增齊民要術師曠占五穀貴賤法常以十月朔日占春糴貴賤風從東來春賤逆此者貴

霧占

增望氣經十月癸巳霧赤為兵青為殃

烏卜

增唐書西域傳東女國巫者以十月詣山中布糟麥咒呼羣鳥俄有鳥來如雞狀剖視之有穀者歲

豐否則有災
名曰烏卜

風雨占

原時後神樞十月十五十八十九二十七日本府君上天界卯時後有惡風如無風即雨又

初八十五二十二日東岳府君朝玉帝主有大風

冬朝晴雨

增農政全書十月立冬晴則一冬多晴雨則一冬多雨亦多陰寒諺云賣絮婆子看冬朝

無風無雨
哭號咷

霜占

增農政全書冬前霜多主
來年旱冬後多晚禾好

朔值占

增家塾事親朔日值立冬主災異值小雪有東
風春米賤西風春米貴其日用斗量米若綴在

斗來春陵
貴甚驗

三卯

增家塾事親十月有
三卯糴平無則穀貴

沫露

原田家五行月內有霧為沫露主來年水大仍相
去二百單五日本水至須看霧著水面則輕離水面

則重

雜紀

祀蚩尤

增史記五帝紀蚩尤注蚩尤冢在東平郡壽張縣開鄉城中高七丈民常十月祀之有赤氣出

如匹絳帛名
為蚩尤旗

未央宮上壽

增漢書高帝紀九年冬十月淮南王梁王趙王楚王朝未央宮置酒前殿上奉玉卮

為太上
皇壽

大風歌

增漢書高帝紀十二年冬十月上還過沛留置酒沛宮悉召故人父老子弟佐酒發沛中兒得

百二十人教之歌酒酣上擊筑自歌曰大風起兮雲飛揚威加海內兮歸故鄉安得猛士兮守四方

獲白麟

增漢書武帝紀元狩元年冬十月行幸雍祠五時獲白麟作白麟之歌注獲白麟因改元曰元

狩也

太守享會

增後漢書郭惲傳汝南舊俗太守十月享會百里內縣皆齋牛酒到府讌飲

夏門

增李尤雒陽城十二門銘夏門值孟位月在亥陰陽不通蝦蟇匿彩迎冬北壇從陰所在

員淵焦石

增拾遺記岱輿山有員淵千里常沸騰以金石投之則爛如土矣孟冬水涸中有黃烟從

地出起數丈烟色萬變山人掘之入數尺得焦石如炭滅有碎火以蒸燭投之則然而青色深掘則火轉盛

鳳凰集

增宋書符瑞志漢宣帝神雀四年十月鳳凰十一集杜陵光武建武十七年十月鳳凰五高八

九尺毛羽五采集潁川郡羣鳥竝從行列蓋地數頃雷十七日乃去安帝延光三年十月壬午鳳凰集京兆新

豐西界
槐樹

東明

增梁書東夷傳高句驪以十月祭天大會名曰東明

次定口車全書

御定月令輯要

三五

得玉璽

增前涼錄建興三年冬十月蘭池長趙嬰上言軍士張冰於青澗水中得一玉璽鈕光照水外

文曰皇帝行璽張寔曰是非人臣所得雷遣使送於京師

冬初衣葛

原隋書袁克傳年十餘歲其父黨至門時冬初克尚衣葛衫客戲克曰袁郎子絺兮綌兮

淒其以風克應聲答曰為絺為綌服之無數

校獵射鹿

增舊唐書太宗紀貞觀四年冬十月十日校獵於貴泉谷十三日校獵於魚龍川自射鹿

獻於大安宮

祭神隧

增唐書高麗傳國左有大穴曰神隧每十月王皆自祭

得金座像

增法苑珠林宋尼釋慧玉長安人也行業勤脩經戒通備嘗南渡樊郢住江陵靈收寺元

嘉十四年十月夜見寺東樹有紫光爛起暉映一林以告同學妙光等而悉弗之見也二十餘日玉常見焉後

寺主釋法弘將於樹下營築禪基仰首條間得金座像高尺許

龍食

增法苑珠林唐貞觀十八年十月汾州并州文水縣兩界天大雷震空中雲內落一石下大如碓噉

脊高腹平時西域摩伽陀菩提寺長年師來到西京內外博知勅問答云是龍食二龍相爭故落下

宮嬪呵筆

增開天遺事李白於便殿對明皇撰詔誥時十月大寒凍筆莫能書字帝勅宮嬪十人侍

李白左右令各執牙筆呵之遂取而書詔其受眷如此

曹弗興畫龍

增名畫錄曹弗興之筆代不復傳秘閣之內一龍而已吳赤烏元年十月大帝遊青

溪見一赤龍自天而下交波而行遂命弗興圖之至宋文帝時累月亢旱祈禱無應乃取弗興畫龍置於水上

應時蓄水成
霧經旬霽霽

永生九穗圖

增宋史五行志乾德二年
十月眉州獻永生九穗圖

竹筒生枝葉

增宋史五行志太平興國五年十月龍水
縣華嚴寺舊截竹為筒引水忽生枝葉長

二丈許知州
姜宣以聞

瑞雪洗疫

增真德秀跋敕封慧應大師後記建寧府浦
城縣景祐南豐院故淨空禪師嘉定十五年

汀邵劍三州疫者各以萬計將及縣境時既十月矣而
炎鬱不少衰知縣亟詣師禱焉風雨旋至瑞雪繼之決

旬之間癘
氣如洗

獻麟

增燕翼貽謀錄太平興國九年十月嵐州獻獸一
角似鹿無斑角端有肉性馴善詔羣臣參驗徐鉉

滕中正王佑等上奏曰
麟也宰相宋琪等賀

佳得

原名真臘風土記真臘每用中國十月為正月是月

人盡掛燈毬花朵之屬其對岸遠離二十丈地則以木
接續縛成高棚如造塔撲竿之狀可高二十餘丈每夜
設三四座或五六座裝烟火爆杖於其上夜則請
國王出觀點放烟火爆杖如是者半月而後止

楊公泉

增續夷堅志道士楊谷字洞微代州人隱居華
山晚愛中方卜居之中方舊無泉苦於遠汲洞

微言山秀如此不應無泉乃齋沐致禱筮之得吉徵是
時十月菴旁近蔡花榮茂洞微云於文草癸為蔡此殆
水徵也與眾道士行尋之見巽隅草樹隱隱有微潤掘
之果得泉可供數百指然東隔絕澗南限羣峯石壁峻
峭幾百步不可越乃就壁取石鑿竅嵌之疊為石梁
甃泉為池自是中方得水甚易至今人目為楊公泉

賞紅梔

增錦繡萬花谷蜀孟昶十月宴芳林園賞紅梔子花其花六出而紅清香如梅

嘉禾

增程史元祐丁卯十月定襄守臣得禾異畝同穎部使者臣商英作嘉禾篇

羲之石硯

增玉海太平興國八年十月己丑越州獻羲之石硯

棗湯

增遵生八牋十月宜進棗湯其方取大棗去皮核於文武火上翻覆焙香然後泡作湯服

達摩渡江

增傳燈錄梁武帝遣使迎請十月一日師至金陵帝問如何是聖諦第一義師曰廓然無

聖帝曰對朕者誰師曰不識帝不領悟師知機不契是月十九日潛迴江北十一月二十三日屆於洛陽當後

魏孝文太和十年也

增明亭牡丹

增元好問滿庭芳詞并序正大四年戊子十月汴京遇仙樓酒家楊廣道趙君瑞皆

山後人其卿僧李菩薩者任人也常就之借宿每酒客
散從外來卧具有閑刺則就之不然赤地亦寢一日天
寒甚楊憐其羈窮飲之酒僧若愧焉晨起僧持酒盃出
同宿者聞嘆聲少焉僧云增明亭前牡丹開矣速往看
之入狂而不信也已乃果有兩花僧亦去京師觀者填
咽酒壚為之一空楊因獲利不貲蓋僧以是報楊也天
上殷韓解羈官府爛遊舞榭歌樓開花釀酒來看帝王
州常見牡丹開候獨占斷穀雨風流仙家好霜天槁葉
穠豔破春柔狂僧誰借手一盃喚起綠怨紅愁看天香
國豔梅菊替人羞盡揭紗籠護日容光動玉笋瓊舟都
人士女年年十月
月常記遇仙樓

鮑照從拜陵登京岷詩

增孟冬十月交殺盛陰欲終風
烈無勁草寒甚有凋松軍井冰

晝結士馬羣夜重晨登岷山首霜雪凝未通息鞍循隴
上支劍望雲峯表裏觀地險昇降究天容東嶽覆如礪

瀛海安
足窮

沈佺期辛丑十月上幸長安時扈從出西嶽詩

增西鎮何穹崇

壯哉信靈造諸嶺皆峻秀中峯特美好傍見巨掌存勢
如石東倒頗聞首陽去開圻此河道磅礴壓洪源巍峩
載清昊雲泉紛亂瀑天磴屹橫抱皇明應天游十月戒
豐鎬微末忝閑從兼得事蘋藻宿心愛茲山意欲拾靈
草陰壑已永閔雲竇絕探討
芳月期再來迴策思方浩

李嶠十月奉敕作

增白藏初送節元律始迎冬林枯黃
葉盡水耗綠池空霜待臨庭月寒隨

入牖風別有歡娛
地歌舞應絲桐

白居易初冬酒熟詩

增霜繁脆庭柳風利剪池荷月色
曉彌苦鳥聲寒更多秋懷久寥落

冬計又如何一甕新
醕酒萍浮春水波

白居易湓浦早冬詩

增潯陽孟冬月草木未全衰祇抵長安陌涼風八月時日西湓水曲

獨行吟舊詩蓼花始零落蒲葉稍離披但作城中想何異曲江池

李賀十月樂詞

增玉壺銀箭稍難傾缸花夜笑凝幽明珠碎霜斜舞上羅幕燭龍兩行照飛閣

惟怨卧不成眠金鳳刺衣著體寒長眉對月鬬彎環

御覽

御定月令輯要卷十八